

Louf Albert a la radunanza de l'Union di Ladins

Endèna l'tradizionèl apuntamento de fin de an l'é stat portà dant l'nef dvd de la sociazion realisà da VideoAlp



I dopiatori fascegn che ge à dat la ousc ai personajes de Silver tel dvd de Louf Albert.

Sociazions - L'Union di Ladins de Fascia à serà sù l'ativitèdes del 2011 con la radunanza generèla di sozi, che chest an é stata endrezèda te l'Oratorie de Poza.

Desche semper la radunanza, estra che esser n moment piagéol de enconter anter i sozi, sporc l'ocajon de renovar l'tesserament a la sociazion, comprèr ite vèlch publicazion, se baratèr i augures da Nadèl e portèr dant vèlch novità.

Chest an l'é stat prejentà l'nef dvd de Louf Albert, n filmat de 60

menuc per ladin dal titol "Nadèl tel mèsc" realisà da VideoAlp de Fulvio De Martin Pinter da Moena.

Apede al dvd, l'Union di Ladins à fat stampèr ence n picol libret che prejentà i gustégoi personajes de la fatoria McKenzie, n lurier che ge desc prestije a nosc lengaz e che l'lo fèsc arvejinèr a la joena generazions con soridanza e simpatia. A ge dèr la ousc ladina ai personajes del filmat l'é stat 13 dopiatori fascegn: Vigile Iori, che se à ence cruzià del coordinament del dopiaje, Luciana Detomas, che

à ence traslatà duc i tesç, e dapò Gerardo Rasom, Marco Soraperra, Loretta Florian, Günther Pezzè, Claus, Giuditta e Ismaele Soraperra, Chiara Detomas, Fernanda Favé, Ottavio Davarda e Thomas Zulian. A la radunanza se à podù veder vèlch tòch de filmat e i dopiatori, desche atores consumé, i à dat na gustégoia cercia del lurier che i à fat.

"Louf Albert che prejonton insnet l'é n prodot per i joegn e per la families - l'ha dit l'president Silvano Ploner - l'portaron te la scoles populères e ge l'daron fora a duc i bec".

L'president te sie descors à metù l'azent su l'importanza del lengaz: "L'ladin no se pel l'amèr e l'tratèr mèl, l'tatarèr su a vèlch vida, se l'portèr dò per defener na poizion. Ge volessa che duc chenc se l'tegnassane tel cher perché aon gust de l' respetèr e de l'valorisèr".

A viventèr l'apuntamento l'era i bec del Bandin de la scola de musega "Il Pentagramma" che, sot la reta ascorta del maester Paolo Rasom, i à endeletà i passa 70 sozi prejenc, enterzan la prejentazion con tòc gustégoi de musega moderna e da Nadèl sonè dassen

delvers.

La scontrèda, che se à serà sù con n bel e bon marendel enjgnà da vèlch conseiera de l'Union col didament de la sociazion Fassa Lux, l'é stat ence l'ocajon per ge fèr cognoscer ai sozi l'atività portèda inant via per chest an da la sociazion e chela perveduda

per l'an che vegn, desche se pel lejer tel box chiò sot ite.

L'nef dvd de Louf Albert l'é stat dat fora per nia ai sozi che à renovà la tessera per l'2012 e l'é a la leta te la senta de l'Union di Ladins a Sèn Jan.

Cristina Marchetti

La ativitèdes de l'Union di Ladins de Fascia

L'maor empegn de la sociazion, operatif e finanzièl, l'é per fèr vegnir fora ogne setemèna, en colaborazion con la Union Generela di Ladins, "La Usc di Ladins", l'sfoi conscidrà strategich per la promozion e l'svilup del lengaz ladin. Cater outes a l'an, enjontà a La Usc, vegn fora ence "Gana", la revista de 60 piates dedichèda a la eles.

De gra a la convenzion sotescrita con l'Comun general, l'Union di Ladins é jita inant con la produzion de program per ladin da manèr fora a Radio Studio Record. Apede program che va inant da egn, desche "N bel bondi ladin", "Che metone pa anché sora fech?" e "Arianeves", l'é tacà ence la trasmiscions "Cater ciàcoles te stua" e "Stroz per la Ladinia" per endrez de Fernando Brunel. De dezembro con la conties dal liber "Picole lum da Nadal", l'é peà via n program de conties e letures che jirà inant ence via per l'an 2012, canche tacarà ence n auter program de intervistes rencurà da vèlch conseier de l'Union.

Con chela de ruèr più apede la jent, la sociazion à tout pèr a l'Aiscuola Ladina ensema col Comun general e altra

istituizions, rencuran l'aspet de l'"identità te vedrina". Te la Pieif de S. Jan l'é stat endrezà l'bel concert furlan "Pascion de Crist dò S. Jan", en colaborazion con l'Istitut cultural ladin e semper adum con l'ICL via per d'istà l'à tout pèr ai evenc "Te anter i tobié" e "Festa ta mont". D'uton no l'é mencià la partezipazion al pelegrinaje forin Baissiston e l'endrez de la tradizionèla Festa del Rengraziament, che chest an à recordà i vieis militanc ladins.

Ence per l'2012 jirà inant l'empegn de slarièr fora l'lengaz ladin con ogne meso. Per chel che vèrda la publicazions l'é pervedu de dèr fora per da Pèsc a n liber ilustrà de salmes per bec, da realisèr en colaborazion con la Comiscion Cultura del Decanat de Fascia e per i 14 de messèl, festa de l'unità ladina, vegnarà prejentà la publicazion su don Massimiliano Mazzel, frut de la tesi de laurea de la conseiera Fernanda Favé. Amò apede la sociazion se met dant de endrezèr n simposie de scultura en colaborazion con la Scola de Fascia, con chela de envièr i joegn artisc fascegn e da foradecà a se sporèr te chesta pràtega. (cri.m)



L'Bandin de la Scola de musega "Il Pentagramma" a viventè la radunanza con sia bela sonèdes.




L'president Silvano Ploner e la vizepresidenta Maura Chiochetti endèna la radunanza.

Pruma presidenta per l'Cai Sat de la Val de Sora

Licia Favé, fia de Renzo Favé, é stata litèda enstadi presidenta de la sezion al post de Evaristo Soraruf che se à dat jù per 15 egn

Sozieta - N mudament important chest'outa a la radunanza anuèla de la sezion Cai Sat de la Val de Sora che é stata ai 2 de dezembro del 2011 aló da l'Hotel La Perla de Cianacei. La emozions les é states più che una



Evaristo Soraruf l'é stat per 15 egn a cef de la sezion.

e dutes te n clim de legreza e de festa portà da la musega e da la compagnia de Giordano Costa.

Dò la cena e l'moment ofiziel con la relazion del President Evaristo Soraruf, la letura di bilanzes e l'aproazion, l'é stat consegnà la "Ègues de Or" a chi che à arjont 25 egn da sozio: Marco Riz, Edith Valentini e dapò a Franco Favé, che ge é stata consegnèda a so i livano.

L'auter moment important de la serèda l'é stat l'renovo de la encèries sozièles che é states vardèdes fora sobito, coscita per la fin de l'assemblea l'é stat dit fora i inomes di più litè. A ciapèr l'maor numer de stimes (97) l'é stat Licia Favé e sobito dò en orden de stimes l'é stat lità: Luigi De Nardin, Rosanna Mattivi, Alessia Ploner, Walter Del Fré, Stefano Bonello, Evaristo Soraruf, Guglielmo Lorenz, Samuele Dioli, Elisa

Maccani e Elisa Vaia. Chisc donca l'é i inomes di componenc del nef diretif, che se à binà per la pruma outa ai 15 de dezembro, canche l'é stat azetà la nomines e dezidù l'nef president, o miec presidenta: Licia Favé, clas 1962, scritta ite al Cai da 34 egn, da Ciampedel e maridèda a Dèlba. Na femena dassen leèda a la mont, n amor che ge è stat tramanà da si genitores, defat Licia la é fia de Renzo Favé, menacrep de nonzech e storich president de la sezion. Se sia sor Marika l'é stat la pruma femena menacrep te Fascia, Licia enveze la é compagnadora de teritorie, na figura profesionèla che perveit na cognoscenza dassen fona de nosc raion da mont.

"No me spetèe chesta encèria - ne à dit Licia - ma voi la portèr inant con gran gaissa e magari portèr ence vèlch neva. Tel diretif dapò l'é ence Stefano Bonello del

Fascia Climbing, che ne didarà a ruèr mingol più apede ai joegn. Se farà l'possibol per dèr l'mieci".

Donca na bela sodesfazion per la pruma presidenta de la sezion Cai Sat de la Val de Sora, che la é ence compagnèda da n bel grop de femenes, desche se veit te la nomines del diretif. Apede a la presidenta l'é stat nominà ence so vize e respondabol di troes da mont che l'é Luigi de Nardin, la cancelistes Elisa Maccani e Elisa Vaia e l'cassier, con chesta encèria azetèda da Evaristo Soraruf, che se dò 15 egn l'à palesà la volontà de lascèr l'post da president, l'à ence dit che sie empegn per la sociazion l'jirà amò inant. A el da man de duc ge é stat sport n gran "Develpai", percheche l'é stat dassen n gran president e na persona de gran valuta e de gran onestà. Donca no podon che augurèr de bona festes e ence n

bon lurier a duta la neva squadra e a duc i sozi del Cai Sat de la Val de Sora. (vr)



Licia Favé é stata litèda enstadi neva presidenta del Cai Sat de la Val de Sora.